

CONVENIO DE COLABORACIÓN ENTRE A CONSELLERÍA DE CULTURA, EDUCACIÓN, FORMACIÓN PROFESIONAL E UNIVERSIDADES E AS UNIVERSIDADES DA CORUÑA, SANTIAGO DE COMPOSTELA E VIGO PARA REFORZO DE PERSOAL DE XESTIÓN DA TRANSFERENCIA E A INNOVACIÓN E CONSOLIDACIÓN DE ESTRUTURAS DE INVESTIGACIÓN

Santiago de Compostela [data/sinatura dixital]

REUNIDOS

Román Rodríguez González, conselleiro de Cultura, Educación, Formación Profesional e Universidades (Consellería) nomeado mediante o Decreto 60/2022, do 15 de maio (DOG núm. 94 do 16 de maio), de acordo co disposto no artigo 34 da Lei 1/1983, do 22 de febreiro, de normas reguladoras da Xunta e da súa Presidencia e no acordo do Consello da Xunta de Galicia do 27 de marzo de 1991, sobre convenios de cooperación con outros entes públicos e de colaboración con particulares, publicado pola Resolución da Consellería de Economía e Facenda do 8 de abril de 1991 (DOG núm. 82, do 30 de abril).

Julio Ernesto Abalde Alonso, reitor magnífico da Universidade da Coruña (UDC), nomeado mediante o Decreto 5/2020, do 9 de xaneiro (DOG núm. 7, do 13 de xaneiro), en representación desta, en virtude das facultades que lle confire o artigo 50.1 da Lei orgánica 2/2023, do 22 de marzo, do sistema universitario.

Antonio López Díaz, reitor magnífico da Universidade de Santiago de Compostela (USC), nomeado mediante o Decreto 35/2022, do 17 de marzo (DOG núm. 56, do 22 de marzo), en representación desta, en virtude das facultades que lle confire o artigo 50.1 da Lei orgánica 2/2023, do 22 de marzo, do sistema universitario.

Manuel Joaquín Reigosa Roger, reitor magnífico da Universidade de Vigo (UVigo), nomeado mediante o Decreto 110/2022, do 9 de xuño (DOG núm. 117, do 20 de xuño) en representación desta, en virtude das facultades que lle confire o artigo 50.1 da Lei orgánica 2/2023, do 22 de marzo, do sistema universitario.

Interveñen en función dos seus respectivos cargos e no exercicio das facultades que teñen conferidas e



EXPOÑEN

PRIMEIRO.- As universidades que integran o Sistema Universitario de Galicia (SUG) son entes que forman parte do sector público institucional que, xunto coa misión docente, realizan actividades de investigación e desenvolvemento científico e tecnolóxico, o que as configura como un dos principais axentes xeradores de coñecemento en Galicia.

O impulso da actividade investigadora é un obxectivo irrenunciable para calquera sociedade, por iso é necesario fomentar unha maior integración entre as universidades e os sectores produtivos, incidir na cultura de calidade e eficacia na utilización de infraestruturas e do capital humano que permitan unha mellora significativa na totalidade dos sectores produtivos e, a súa vez, a potenciación dunha universidade galega de calidade.

SEGUNDO.- A Secretaría Xeral de Universidades é o órgano superior da Administración xeral da Comunidade Autónoma de Galicia para a ordenación, planificación e execución das competencias en materia de universidades e ensinanza universitarias correspondentes á Consellería de Cultura, Educación, Formación Profesional e Universidades en relación coas atribuídas polo artigo 31 do Estatuto de Autonomía para Galicia. A Secretaría Xeral de Universidades, de acordo coas competencias que lle outorgou o Decreto 119/2022, do 23 de xuño (DOG núm. 126, do 4 de xullo), de estrutura orgánica da Consellería, debe velar pola promoción e xestión eficiente e integradora dos recursos e capacidades de investigación do SUG para a súa posta en valor no marco do sistema de innovación e, particularmente, a promoción da coordinación das universidades galegas no establecemento de programas, infraestruturas e actuacións en materia de investigación.

TERCEIRO.- O 8 de abril de 2022, o Consello da Xunta de Galicia adoptou o acordo mediante o cal se aprobou a Estratexia de especialización intelixente (RIS3) de Galicia 2021-2027, que define o marco para as políticas de investigación e innovación na Comunidade Autónoma para este período, así como o Plan Galego de investigación e innovación 2022-2024, que concreta desde un punto de vista operativo este marco estratéxico.



A RIS3, no período 2021-2027, aborda a través da I+D+i tres grandes retos da economía e a sociedade galega. Para darlles resposta, por unha banda, a estratexia orienta as capacidades e esforzos de investigación e innovación en Galicia cara a 3 prioridades temáticas transversais, e pola outra reforza e impulsa o ecosistema galego de innovación a través de 5 obxectivos estratéxicos, arredor dos que articula os instrumentos e actuacións a desenvolver integrados nos correspondentes programas.

Os instrumentos, apoios e actuacións que se desenvolven no marco da RIS3 en relación con cada obxectivo estratéxico recóllense nos correspondentes programas. O obxectivo estratéxico 1 busca acadar un ecosistema máis aberto e integrado, facilitando a colaboración e o aliñamento coa especialización de Galicia.

En consecuencia, o presente convenio enmárcase na RIS3 respondendo aos tres retos e ás tres prioridades. Ten como obxectivo estratéxico facer máis visible e accesible a oferta de coñecemento e facilitar a transferencia ao conxunto do tecido empresarial (obxectivo estratéxico 1), integrándose polo tanto no programa Integra.

Dentro do Plan Galego de investigación e innovación 2022-2024, a Consellería de Cultura, Educación, Formación Profesional e Universidades ten especial relevancia en varias liñas de actuación. Podemos destacar a liña 1.1, dedicada ao fortalecemento das capacidades de oferta de I+D+i para a investigación de excelencia e para a i+D próxima ao mercado nos ámbitos de especialización. Como actuacións a despregar na mesma atopamos o apoio para o persoal de i+D e investigador dos centros de xeración de coñecemento.

CUARTO.- Que a Lei 6/2013, do 13 de xuño, do Sistema Universitario de Galicia establece no seu artigo 111 que a transferencia de coñecemento é un dos mecanismos polos que o valor creado na universidade a través da investigación retorna á sociedade. Pola súa contribución ao desenvolvemento e ao crecemento económico, a transferencia constitúe unha actividade fundamental para a universidade.

QUINTO.- No ámbito universitario, o persoal de xestión da transferencia e a innovación, constitúe unha panca básica para potenciar os resultados das



actividades investigadoras. O obxectivo destas axudas é incentivar a contratación laboral de persoal técnico de apoio en organismos de investigación e a dar soporte no manexo de equipos, instalacións e infraestruturas de I+D+i a fin de incrementar e mellorar as prestacións e rendemento das infraestruturas científico-tecnolóxicas.

Estas unidades deben ser reforzadas para poder cumprir os obxectivos aos que se enfrontan na actualidade.

SÉXTO.- Polo anteriormente exposto, a Consellería de Cultura, Educación, Formación Profesional e Universidades, e as universidades públicas galegas coinciden en salientar a necesidade de fomentar accións que conduzan ao desenvolvemento dos servizos para a xestión do coñecemento científico e a valorización e proxección económica das actividades e resultados da súa investigación.

CLÁUSULAS

PRIMEIRA.- Obxecto do Convenio

O obxecto deste convenio é establecer as condicións polas que se rexerá a colaboración, no período 2023-2026, entre a Consellería de Cultura, Educación, Formación Profesional e Universidades e as tres Universidades públicas do SUG para executar accións destinadas ao desenvolvemento e consolidación dos Servizos Xerais de Apoio á Investigación.

O obxectivo final é axudar ás universidades a optimizar e incrementar as súas capacidades en investigación e transferencia de coñecemento.

O orzamento será de **18.798.120,00 €**, orientados a un ámbito de actuación:

Actuación 1.- Servizos de Apoio á Xestión da transferencia e a innovación das universidades públicas do SUG.

As unidades de destino ou número estimado de contratos a financiar serán os seguintes:



UDC - Centro de Investigación ou Servizos centrais de Investigación	Nº aproximado de contratos
Rede de centros	4
Centro de Investigación - CITIC	7
VPCIT	1
VEPES e VPCIT	2
Centro de investigación - CITEEC	2
Centro de investigación - CICA	4
Centro de investigación - CITENI	2
Servizos de apoio á investigación (ORI/OMA/AXD/XF e SAI)	6
Servizos centrais da investigación	6
Total	34

USC - Área de traballo	Nº aproximado de contratos
Xestión de actividades de I+D	3
Promoción e estratexia científica	9
Transferencia e emprendemento	4
Apoio á internacionalización e captación de talento	5
Apoio á xestión de programas e centros/institutos de investigación	7
Infraestruturas científicas e fomento da cultura e a divulgación científica	15
Fundación Rof Codina-CEBIOVET 4	4
Total	47

UVIGO- Área de traballo	Nº aproximado de contratos
Oficina de I+D	3
Oficina de proxectos Internacionais	11
Unidade de Cultura científica	3
Escola Aberta de Formación Permanente	1
Vicerreitoría de Estudantado e Empregabilidade	1
CACTI	2
CINTECX	2
Campus de especialización	4
ECOBAS	2
Total	29

SEGUNDA.- Distribución dos fondos

Os fondos distribuiranse tendo en conta as necesidades de persoal manifestadas polas universidades públicas do SUG en base ao criterio "Porcentaxe de persoal docente e investigador (PDI)" de cada universidade no curso 2020-21.



Segundo os datos do Sistema integrado de información universitaria (SIIU), a Universidade da Coruña representa o 28,17% do PDI; a Universidade de Santiago de Compostela o 40,32%; e a Universidade de Vigo, o 31,51%.

Con todo o exposto, a distribución dos fondos entre as tres universidades sería a recollida na seguinte táboa:

Universidade	Ano 2023	Ano 2024	Ano 2025	Ano 2026	TOTAL
UDC	1.323.857,60	1.323.857,60	1.323.857,60	1.323.857,60	5.295.430,40
USC	1.894.850,50	1.894.850,50	1.894.850,50	1.894.850,50	7.579.401,98
UVigo	1.480.821,90	1.480.821,90	1.480.821,90	1.480.821,90	5.923.287,61
TOTAL	4.699.530,00	4.699.530,00	4.699.530,00	4.699.530,00	18.798.120,00

TERCEIRA.- Financiamento

A dotación da Consellería para este convenio é de dezaioito millóns setecentos noventa e oito mil cento vinte euros (18.798.120,00 €), distribuído en catro anualidades, con cargo ao Plan galego de financiamento universitario 2022-2026 (aprobado polo Acordo do Consello da Xunta de Galicia do 16 de decembro de 2021, DOG número 248, do 28 de decembro), aplicación orzamentaria 10.03.561B.444.0 (código de proxecto 2016 00129).

Esta cantidade de 18.798.120,00 euros trátase dun importe certo, e queda por conta das partes beneficiarias a diferenza de financiamento necesario para a total execución da actividade subvencionada, debendo ser reintegrado o financiamento público unicamente no caso e polo importe que supere o custo total e real da actividade, segundo o establecido no artigo 21.2 do Regulamento de subvencións de Galicia.

De acordo co establecido no artigo 29 da Lei 9/2007, de 13 de xuño, de subvencións de Galicia, considéranse gastos subvencionables aqueles que, de modo indubidable respondan á natureza da actividade subvencionada. Concretamente, con cargo a este convenio financiaranse exclusivamente contratos de persoal técnico de apoio vinculados aos servizos de investigación, xestión da transferencia e a innovación, ou ao reforzo das estruturas de investigación, nas tres universidades públicas do SUG.

A axuda é compatible con outras concedidas para o mesmo fin pero, en ningún caso, o importe da subvención achegada pola consellería poderá ser

Páxina 6 de 14



de tal contía que, illada ou en concorrência con outras subvencións, supere o custo da actividade subvencionada, tal como se establece no artigo 17.3 da Lei 9/2007, do 13 de xuño, de subvencións de Galicia.

De conformidade co artigo 31.7 da Lei 9/2007, do 13 de xuño, de subvencións de Galicia, e de conformidade co establecido no artigo 11.e) do Decreto 11/2009, do 8 de xaneiro, polo que se aproba o regulamento da Lei 9/2007, de subvencións de Galicia, a obriga de presentar a certificación do cumprimento de obrigas coa Administración pública da comunidade autónoma, coa Administración do Estado e coa Seguridade Social substituírse por unha declaración responsable de estar ao día no cumprimento das obrigas tributarias ou fronte á Seguridade Social e de non ter pendente de pagamento ningunha outra débeda coa Administración.

CUARTA.- Compromisos das partes

A Consellería de Cultura, Educación, Formación Profesional e Universidades comprométese a contribuír ao financiamento e consolidación das unidades de apoio á investigación das tres universidades que forman parte do SUG.

Concretamente, con cargo aos gastos derivados das accións deste convenio, a Consellería comprométese a financiar contratos de persoal destinados a desenvolver o apoio á actividade investigadora.

Pola súa parte, as universidades comprométense a reforzar as unidades de apoio á investigación co fin de optimizar e render as súas capacidades en investigación e transferencia de coñecemento.

As universidades tamén comprométense a facilitar cantos datos resulten necesarios para a valoración do instrumento no marco da avaliación da RIS3 Galicia ou doutros mecanismos, en particular as enquisas do INE, relacionados coa medición da I+D+i. Os datos asignados aos citados instrumentos de avaliación deberán estar consignados á Comunidade Autónoma de Galicia. No marco de seguimento e avaliación da RIS3 Galicia, desenvolverase un seguimento específico das axudas concedidas. Este seguimento estará baseado na recompilación de información acerca dos resultados económicos e científico-técnicos obtidos polas entidades beneficiarias. A tales efectos, durante a execución e ao finalizar a axuda (expost), os beneficiarios deberán proporcionar información



relativa a unha serie de indicadores, entre os que se incluírán indicadores xerais e específicos de I+D+i.

De non facilitar cantos datos resulten necesarios para o seguimento e a avaliación do instrumento no marco da avaliación da RIS3 Galicia ou outros instrumentos relacionados coa medición da innovación será causa de reintegro de ata o 1 % da subvención concedida.

QUINTA.- Fórmula de pagamento

Para o pagamento, cada universidade achegará antes do 1 de decembro de cada anualidade:

- Unha certificación expedida polo órgano de control que corresponda na que se acredite a toma de razón en contabilidade, que se cumpriu a finalidade do presente convenio e que os fondos foron destinados a este fin, así como o detalle da realización dos gastos e dos pagamentos. Os pagamentos correspondentes ás nóminas e seguridade social dos meses de novembro e decembro de cada anualidade presentaranse como xustificante de gasto do ano seguinte. No caso da última anualidade 2026, dado que o dito prazo debe cumprir co establecido no artigo 45.5 do Decreto 11/2009 do 8 de xaneiro polo que se aproba o Regulamento da Lei de subvencións, o prazo de xustificación das nóminas de novembro e decembro deberá realizarse dentro da anualidade 2026.
- Unha memoria explicativa que certifique as actividades desenvolvidas con cargo aos fondos recibidos na que se incluírá táboa-resumo que recolla, como mínimo, os seguintes datos: relación nominal de persoal contratado; DNI ou NIE; categoría/nivel profesional; duración contrato; data inicio/fin; retribución total do contrato; centro de traballo concreto para cada persoa contratada. Deberá entregarse memoria en folla de cálculo editable e pdf asinado polo órgano de control.
- Relación de indicadores asociados ao seguimento do persoal contratado no marco deste convenio para cada anualidade. Deberá entregarse memoria en folla de cálculo editable e pdf asinado polo órgano de control.



- Unha declaración complementaria do conxunto das axudas solicitadas, tanto as aprobadas ou concedidas como as pendentes de resolución, para este fin, das distintas administracións públicas.
- Así mesmo, de conformidade co artigo 31.7 da Lei 9/2007, do 13 de xuño, de subvencións de Galicia, deberá presentar certificación de estar ao corrente nas obrigas tributarias e coa Seguridade Social e de non ter pendente de pagamento ningunha outra débeda coa Administración.

Como financiamento necesario para poder levar a cabo as actuacións inherentes á subvención concedida para cada anualidade, de acordo co previsto no artigo 63 do Decreto 11/2009, do 8 de xaneiro, polo que se aproba o regulamento da Lei 9/2007, do 13 de xuño, de subvencións de Galicia, no primeiro trimestre de cada un dos exercicios previstos na cláusula segunda a partir da anualidade seguinte á sinatura do convenio, as universidades poderán solicitar o anticipo do 50% dos fondos previstos para o exercicio respectivo.

A concesión do anticipo realizarase mediante resolución motivada do Conselleiro de Cultura, Educación, Formación Profesional e Universidades, previa solicitude debidamente xustificada da entidade beneficiaria.

A concesión de anticipos quedará condicionada ao cumprimento, da parte beneficiaria, dos requisitos establecidos no artigo 31 da Lei 9/2007, do 13 de xuño, de subvencións de Galicia.

A realización de pagamentos anticipados e a realización de pagamentos a conta está exenta da constitución de garantías por parte das universidades, de acordo co artigo 65.4 do Decreto 11/2009, do 8 de xaneiro, polo que se aproba o Regulamento da Lei 9/2007, do 13 de xuño, de subvencións de Galicia e o artigo 53 da Lei 6/2022, do 27 de decembro, de orzamentos xerais da Comunidade Autónoma de Galicia para o ano 2023.

SEXTA.- Responsabilidade

A subscrición do presente convenio non supón relación laboral contractual ou de calquera outro tipo entre os/as profesionais que vaian a desenvolver as actividades e a consellería, de tal xeito que non se lle pode esixir



responsabilidade ningunha, indirecta nin subsidiaria, polos actos ou feitos acontecidos no seu desenvolvemento.

SÉTIMA.- Comisión de seguimento

Para o seguimento do convenio ou coñecemento de calquera cuestión sobre a súa interpretación, modificación, resolución ou efectos deste que poidan xurdir, créase unha comisión mixta constituída do seguinte modo:

- Tres membros da Secretaría Xeral de Universidades, dos que un/unha actuará como presidente/a.
- O/a vicerreitor/a da UDC responsable destas accións ou persoa en quen delegue.
- O/a vicerreitor/a da USC responsable destas accións ou persoa en quen delegue.
- O/a vicerreitor/a da UVigo responsable destas accións ou persoa en quen delegue.

Esta comisión actuará como órgano de vixilancia, seguimento e control do establecido neste convenio, promovendo, se o considera conveniente, outras actuacións que poidan enriquecer o seu desenvolvemento.

Non obstante, todas aquelas cuestións que se susciten en relación co outorgamento, cumprimento, xustificación e pagamento, así como o reintegro e determinación das posibles responsabilidades relativas á subvención concedida serán resoltas pola consellería.

OITAVA.- Modificación da subvención

Consonte o disposto no artigo 17.4 da Lei 9/2007, toda alteración das condicións tidas en conta para a concesión da subvención poderá dar lugar á modificación do convenio.

Calquera modificación que as partes acorden realizar sobre o presente convenio deberase formalizar por escrito. Así mesmo, e de conformidade co disposto no artigo 31.4 da Lei 14/2013, do 26 de decembro, de racionalización



do sector público autonómico, os convenios subscritos pola Administración xeral da Comunidade Autónoma e as entidades instrumentais do sector público autonómico poderán ser obxecto de modificación cando teñan como finalidade o logro dos obxectivos de estabilidade orzamentaria e sostenibilidade financeira.

Ditas modificacións terán por obxecto a redución do volume das obrigas ou a ampliación do seu prazo de execución.

NOVENA.- Extinción do convenio

Non obstante o establecido na cláusula anterior, este convenio poderá extinguirse por acordo mutuo e voluntario das partes, por renuncia dalgunha ou por denuncia deste por incumprimento dalgunha delas, o que se comunicará fidedignamente, logo de audiencia desta e con, polo menos, un mes de antelación. Así mesmo, o convenio extinguirase polas causas previstas no artigo 51 da Lei 40/2015, do 1 de outubro, de réxime xurídico do sector público. En calquera destes casos, así como no caso de incumprimento das obrigacións e compromisos asumidos por cada unha das partes, procederase á revogación da axuda, así coma ao reintegro total ou parcial das cantidades percibidas e a esixencia de xuros de mora nos casos previstos no artigo 33 da Lei 9/2007, do 13 de xuño, de subvencións de Galicia.

De acordo co artigo 14.1.n da Lei 9/2007, os criterios de gradación dos posibles incumprimentos para determinar a cantidade que se vai minorar ou reintegrar serán os seguintes:

- a) O incumprimento total dos fins para os que se concede a subvención, da realización dos gastos subvencionables ou da obriga de xustificación dará lugar á perda do dereito ao cobro ou, no seu caso, ao reintegro da axudas percibida.
- b) Calquera outro incumprimento considerarase incumprimento parcial dos fins para os que se concedeu a axuda, da realización dos gastos subvencionables ou da obriga de xustificación, e dará lugar á perda do dereito ao cobro ou, no seu caso, ao reintegro na porcentaxe correspondente á inversión non efectuada ou non xustificada.

DÉCIMA.- Vixencia do convenio



O presente convenio entrará en vigor coa sinatura dixital do último dos asinantes, e atenderá accións realizadas desde o 1 de xaneiro de 2023, tendo vixencia ata o 31 de decembro do 2026.

UNDÉCIMA.- Natureza do convenio

De acordo co establecido no artigo 36 do Decreto 11/2009, do 8 de xaneiro, polo que se aproba o regulamento da Lei 9/2007, do 13 de xuño, de subvencións de Galicia, este convenio ten un interese público, pola necesidade de reforzar as capacidades de investigación e transferencia das universidades de Galicia.

As actuacións estenderanse ás tres universidades públicas galegas, potenciando a racionalización do mapa universitario e concretándose na promoción, deseño e materialización dos instrumentos necesarios para mellorar o financiamento estrutural da súa actividade investigadora.

Polo tanto, non é necesario promover a concorrência competitiva por tratarse dunha acción coordinada que inclúe a todos os posibles beneficiarios para o mesmo fin.

Este convenio de colaboración ten a natureza dos previstos no artigo 6 da Lei 9/2017, do 8 de novembro, de Contratos do Sector Público, pola que se traspoñen ao ordenamento xurídico español as Directivas do Parlamento Europeo e do Consello 2014/23/UE e 2014/24/UE, de 26 de febreiro de 2014, e realízase ao amparo do establecido nos artigos 47 e seguintes da Lei 40/2015, do 1 de outubro, de réxime xurídico do sector público, rexéndose polo establecido nas súas cláusulas e polo establecido na Lei 9/2007, do 13 de xuño, de subvencións de Galicia e o seu regulamento, aprobado polo Decreto 11/2009, do 8 de xaneiro.

De acordo co disposto na comunicación da comisión relativa ao Marco sobre axudas estatais de investigación e desenvolvemento e innovación (DOUE C 414/1), publicado no Diario Oficial da Unión Europea do 28 de outubro de 2022, a subvención contemplada neste convenio non constitúe axuda de Estado nos termos do artigo 107 do Tratado de funcionamento da Unión Europea ao tratarse de financiamento público de actividades non económicas como instrumento axeitado para dar resposta a obxectivos e fins de interese común, en particular, a coordinación e cooperación como elemento relacional básico para a racionalización do mapa universitario e o fortalecemento do



conxunto das universidades galegas respectando a identidade de cada unha delas (artigo 2.1.c da Lei 6/2013, do 13 de xuño, do Sistema universitario de Galicia).

Non obstante a UDC, USC e a UVigo deberán garantir que as actividades derivadas deste convenio se axustan ás normas procedimentais e materiais vixentes no momento da concesión da axuda, debendo informar á consellería por medio da comisión de seguimento.

DUODÉCIMA.- Publicidade

Segundo a disposición adicional do Decreto 132/2006, do 27 de xullo, polo que se regulan os rexistros públicos creados nos artigos 44 e 45 da Lei 7/2005, do 29 de decembro, de orzamentos xerais da Comunidade Autónoma de Galicia para o ano 2006, a UDC, a USC e a UVigo consenten expresamente para que a Administración inclúa e faga públicos, nos rexistros regulados neste decreto, os datos relevantes referidos ás axudas e subvencións recibidas, así como ás sancións impostas.

A reserva que puideran facer as beneficiarias no sentido de non autorizar a obtención dos datos ou a publicidade destes nos rexistros, que en todo caso terán que expresarse, poderá dar lugar á exclusión do proceso de participación para obter a axuda ou á revogación do acto de outorgamento.

A sinatura deste convenio suporá o consentimento para incluír e facer públicos os datos referidos ao convenio de conformidade co artigo 15 da Lei 1/2016, do 18 de xaneiro, de transparencia e bo goberno, co artigo 8 da Lei 19/2013, do 9 de decembro, de transparencia, acceso a información pública e bo goberno e co Decreto 126/2006 do 20 de xullo, polo que se regula o rexistro de convenios da Xunta de Galicia.

Así mesmo, as partes asinantes deste convenio manifestan o seu consentimento para que os datos persoais que constan no mesmo, así como o resto das especificacións contidas no mesmo, poidan ser publicados no Portal de Transparencia e Goberno Aberto.

As subvencións estarán sometidas á función interventora e de control financeiro exercida pola Intervención Xeral da Comunidade Autónoma, nos termos que establece a Lei 9/2007, do 13 de xuño, de subvencións de Galicia. Así mesmo, estarán sometidas ás actuacións de comprobación previstas na



lexislación do Tribunal de Contas e do Consello de Contas no exercicio das súas funcións de fiscalización e control do destino das subvencións.

En aplicación dos principios recollidos na Lei 19/2013, do 9 de decembro, de transparencia, acceso á información pública e bo goberno, de acordo co indicado na actual redacción do artigo 20 da Lei 38/2003, do 17 de novembro, xeral de subvencións e segundo o disposto nos artigos 3.1, b) e 15 da Lei 1/2016, do 18 de xaneiro, de transparencia e bo goberno, a información correspondente ao presente convenio publicarase na Base de Datos Nacional de Subvencións.

DÉCIMA TERCEIRA.- Resolución de controversias

O presente convenio réxese polo ordenamento xurídico administrativo, con expresa submisión das partes á xurisdición contencioso-administrativa, nos termos que se establecen no artigo 47 e seguintes da Lei 40/2015, do 1 de outubro, de réxime xurídico do sector público.

De acordo co establecido no artigo 53 de dita lei este convenio deberá ser remitido ao Consello de Contas nos termos que no mesmo se establecen.

Lido por todas as partes, por si mesmas, e como proba de conformidade co expresado no presente convenio, asínano dixitalmente.

Román Rodríguez González
Conselleira de Cultura, Educación, Formación Profesional e Universidades

Julio Ernesto Abalde Alonso
Reitor da Universidade da Coruña

Antonio López Díaz
Reitor da Universidade de Santiago de Compostela

Manuel Joaquín Reigosa Roger
Reitor da Universidade de Vigo

